

23 IUNIE

**SLUJBA
SF. CUVIOS
LUCIAN
DE LA
ALEXANDROV**

MINEIUL-RU



Служба преп. Лукиану Александровскому

ВЕЧЕРНЯ

Стихиры на Господи возвах, гл.

Подобен: Небесных чинов радование:

Приидите, монаси и мирстии, / воспоим Господа
Единаго / в скорбех Помощника и радости
Подателя / всем вся на пользу Творящаго / Силу
сильных и Укрепление немощных / Владыку
живота и Воскресения / Истиннаго Учителя
пасомых и пастырей / Даровавшего земли нашей
чудотворцев дивных / преподобных Лукиана и
Корнилия / ихже святым предстательством,
Христе, // спаси души наша.

Восхвалим, вернии / Лукиана монаха добраго /
дерзновение пред Господем стяжавшаго /
заповедем преданнаго, житием чистаго / молим
тя, отче преподобне, / буди нам отец
чадолюбивый / и духовный наставник
искусный // да тобою водимии, спасемся.

На Промысел Божий присно надеявся,/ добре преплыл еси живота течение/ вся от руки Господни с благодарением принимая,/ отгнал еси от сердца обиды горькия/ и опечаливших тя прощал еси/ темже награди тя Владыка сторицею/ душу сподобив веселия божественнаго// и тело нетлением и чудесы прославив.

Глас 5, Подобен: Радуйся, Живоносный Кресте:

Радуйся, Лукиане чудотворче,/ яко вера твоя спасе тя воистину/ и прошение твое ко Господу исполнися/ срадуемся и мы тебе, отче преподобне/ се, бо обитель твоя молитвами твоими возрождается/ и светло светит людем, в житейстем мори сущим, скорбьми обуреваемым/ и Жертва Пречистая о всех zde совершается// и да будет тако до скончания века.

Радуйся, Лукиане отче наш/ лозы Христовы рождие доброе/ плод сторичный принести Богу потщавыйся/ таинства благодатными душу просветил еси/ и повелении Господними ум освященный приобрел еси/ темже молитвами твоими светлыми/ омрачения греховнаго и тьмы вечныя избегнути надеемся// и сыны Света нарецися уповаем.

Слава, гл.6: Благодарим Тя, Дево Всепетая,/ яко явлением цельбоносныя иконы Рождества Твоего/ обитель сия украшается/ и святостию угодников Христовых Лукиана и Корнилия// поныне прославляется.

И ныне: Праздника

Стихира на литии, гл.1:

Небо Благодатное, звездами светлыми усеянное/
Ты еси, Богородице,/ посреде них Лукиан
угодник Божий дивный/ сокровище на Небеси
себе собравый/ и в обитель райскую душу свою
претворивый,/ сподоби ны, Мати Чистая, в
мире сем пожити праведно,/ подражая
славному Твоему молитвеннику// и в обители
вышня преселитися.

Стихиры на стиховне, гл.7:

От чрева матерня молитвою освященный/ образ
благочестия в родителех твоих обрел еси/ путь
делания иноческаго измлада избрал еси/ крест
свой мужественне понесл еси / на древо
Крестное Спасителево присно взирая/ от
сопостата искушен быв люте/ помощь и молитва
искушаемым явился еси/ и нас от бед и
обстояний избави// Лукиане преподобне отче
наш.

Стих: Терпя потерпех Господа, и внят ми и
услыша молитву мою.

На высоту добродетели восшел еси / вкупе со
отцем твоим Димитрием / иже яко Авраам
Исаака на заклание Богу жертвенное /
благослови тя на подвиг монашеский, / сиесть
миру суетному умирание / и со страстьми
борение тяжкое // и Христу сораспятие.

Слава, глас тойже:

Радуйся, Лукиане отче наш / возлюбивый
Господа и Пречистую паче земных твоих
родителей / правду паче всякия лъсти и
лукавства / уединение святое и молчание паче
пустословия празднаго / снеди скудныя паче
чреву угождения / житие многоскорбное паче
веселия суетнаго // тем и достоин явился еси
многия любви Божия.

И ныне: Праздника.

Тропарь, гл. 4

Приспе день торжества святых земли
Владимирския / и память преподобных отец
Александровских / Лукиана, добродетели
жилищем светлым ся сотворшаго / и Корнилия,
силою Божиею диавола поправшаго / молитесь
ко Господу, двоице преславная / да дарует нам,

во гробех греха сущим// воскресение и велию
МИЛОСТЬ.

УТРЕНЯ

Седален по первой кафизме, гл.4.

Воистину свята земля сия,/ есть бо место
таинственного к Богу душ многих
восхождения,/ мученичества за Христа
бескровного// и с Нимже воскресения светлаго.

И ныне: Праздника

Седален по второй кафизме, гл.4.

Исцели души наша немощныя/ Лукиане отче
преподобне/ уврачуй язвы греховныя/ ослаби
приражения страстей// и здравие душевное и
телесное подаждь нам молитвами твоими.

И ныне: Праздника

Седален по полиелеи, гл.2

Кто взыдет на гору Господню/ или кто станет на
месте святем Его/ и наставник монахов
наречется велий/ токмо сердцем чист и душою
непорочен/ Лукиан преподобный и праведный/
ангелы собеседники имевый/ и от человеков
ныне ублажаемый/ буди свет душам нашим,

отче // и молися за ны пред престолом Господа
Всевышняго.

Стихира по 50 псалме, гл.6.

Яко покаяния подвижника изряднаго, /
утвердил есть Господь сердце твое чисто / и дух
прав обновил во утробе твоей /, не отъял от тебе
Духа Своего Божественнаго, / но радостию
спасения воздал тебе щедро / темже Лукиане,
отче наш / научи ны каятися Богу со
смирением // да помилует нас по велицей Своей
милости.

Канон, гл.1

Песнь 1

Твоя победительная десница / боголепно в
крепости прославися / та бо Безсмертне яко
всемогущая противныя сотре // израильтяном
путь глубины новосоделавшая.

Песнь воспоем Богу Вседержителю / и
восхвалим силу Его прославльшаго / Лукиана
преподобнаго, раба благаго и вернаго // ангела
земнаго и человека небеснаго.

Твою победительную десницу / прославляем
днесь, Боже наш / та бо изводит из рова

страстного и из пустыни скорбных / души,
спасения возжаждавших.

Слава: Память твою светлую празднующую, /
озари ны, грехом омраченныя / Троицы светом
Божественным и несозданным / / егоже ныне
зриши несредственне, Лукиане, отче наш.

И ныне: Услыши прошения наша, Владычице /
в день печали Тебе возносимыя / молят Тя
святити земли Владимирския вкупе с
преподобными Лукианом и Корнилием / и
помощь Твою всебогатую нам ниспошли.

Песнь 3

Едине Ведый человеческого естества немощь / и
милостивно в не воображься / препояши ны с
высоты силою / еже вопити Тебе: // Свят
одушевленный Храм неизреченныя Твоея славы,
Человеколюбче.

Спасение свое бодро по вся дни совершал еси /
един Единому Господу работая, / благодатию и
силою свыше препоясанный / постом и
молитвою страсти победил еси // и в покой
Божественный вшел еси яко до конца
претерпевый.

Завету Христову следовал еси, Лукиане святе / и
враты тесными потщался еси Царства

достигнути/ от врага борим быв/ скорбьми и лишении горькими// смирением уязвил тя язвещаго и потопил еси вся козни вражии покаянием слезным.

Слава: Притрудно бысть начало пути твоего иноческаго/ преподобне Лукиане, отче наш/ воздержанием плоть свою изнурил еси,/ в подвизах не ослабевая// и точию средины лет достигнув, был еси яко старец, сединами убеленный.

И ныне: Бога Истиннаго и Человека естеством родила еси, Дево,/ Честнейши всякия твари Явльшися,/ хвалим Тя и Господу поем:// Свят одушевленный Храм неизреченныя Твояе славы, Человеколюбче.

Седален, гл. 1

Трикраты вопрошал еси, Господи, апостола Твоего верховнаго:/ любиши ли Мя, Петре;/ испытати того желая,/ такожде и преподобнаго Лукиана не единожды удалял еси от святаго места сего,/ увидев же произволение его доброе,/ вселил zde избранника Своего и рекл еси ему:// Паси овцы Моя и буди пастырь добрый стаду Моему избранному.

Слава: Марие, Мати Божия,/ да будет обитель
Твоя дом прибежища и пристанище
благоотышное/ всем хотящим жати спасения и
жизни вечныя.

И ныне: Праздника

Песнь 4

Гору Тя благодатию Божию приосененную/
прозорливыма Аввакум усмотрев очима/ из Тебе
изыти Израилеву провозглашаше святому// во
спасение наше и обновление.

Место свято и благодатию Божию
приосененное/ прозорливыма Лукиан усмотрев
очима/ идеже виноград духовный насадити
имать Десница Божия// во спасение многих и
обновление.

Храмостроитель быв усердный, отче
преподобне/ церковь Рождества Богородицы
возвел еси/ идеже образ чудотворный яко
свотильник на свещнице поставил еси//
моления теплыя пред ним возсылая.

Едино от Господа просил еси, отче/ еже жити
тебе в дому Господни/ и присещати святыи
храм Его и молитися о пастве твоей// Духом
Святым ти вверенней.

Слава: Лукиане, пастырю освященный и ревностный/ не токмо о храмах рукотворенных усердствовал еси,/ но прежде в чистоте хранити сердце наставляя// яко Богу Престол и Жертвенник живой.

И ныне: Богородице, иноком Отрадо Благодатная,/ девственником Славо и Укрепление/ помози нам целомудренно в веце сем пожити// и души чисты Христу предуготовати.

Песнь 5

Просветивый сиянием пришествия Твоего, Христе/ и осветивый Крестом Твоим мира концы/ сердца просвети светом Твоего богоразумия// православно поющих Тя.

Свету тезоимените, Лукиане, отче честный,/ во свет истины евангельския облекся еси/ и древо светлоплодовитое явился еси// монахов множество произрастившее.

Лампады во храме твоём, аще и разорен есть, не угасают,/ возжены бо верою твоею светлою/ и полны суть огня святаго и бессмертнаго// имже души верных осияваеши.

Слава: Свеща светлая, молитвою чистою пламенеющая/был еси, Лукиане достоблаженне/

науци ны молитися Богу Духом и истиною //
таковых бо поклонников ищет Господь.

И ныне: Светоприемница сущи, Пламень
Невещественный во чреве Носящая,/
Отроковице Нескверная и Мати Чистая,/
просвети нас светом Чада Твоего
Божественнаго, // православно поющих Тя.

Песнь 6

Обыде нас последняя бездна / несть избавляй /
вменихомся яко овцы заколения / спаси люди
Твоя, Боже наш, // Ты бо крепость
немощствующих и исправление.

Юрод Христа ради явился еси, / отче Лукиане /
наветы ложныя на пользу души обраща / и
похвалы худши поношения вменя, // и
клеветника древняго тем посрамил еси.

Силен духом и верою богат быв, / Лукиане
святе / нивчтоже себе вменял еси, / источник
всякаго блага в Бозе полагая // в Немже
крепость немощствующих и исправление.

Слава: Видя подвиги твоя тайныя, / Лукиане
мудре, / воздаде тебе Отец Небесный яве / и
вознесл тя во время // темже и нас от
славолюбия лукаваго сохрани.

И ныне: Буди милость Твоя на нас,/ Дево
Непорочная,/ без покаяния не остави грешныя
рабы Твоя/ от осуждения страшнаго избави
ны// Ты бо крепость немощствующих и
исправление.

Кондак, гл.3

Днесь преподобнии отцы Лукиан и Корнилий/
предстоят невидимо Владычице Небесной/ и с
лики святых за ны молятся Деве:/ спаси, Мати
Божия, люди, на Тя уповающия/ покрый я от
бед и страстей милосердия ризою/ и
поклонитися сподоби Христу Воскресшему//
Пасху празднующе вечную.

Песнь 7

Тебе умную, Богородице, пещь/ рассмотрим
вернии:/ якоже бо отроки спасе три
Превозносимый, мир обнови/ во чреве Твоем
всецел/ хвальный отцев Бог и препрославлен.

Искал и обрел еси Бисер драгий, Христа
Желаемаго/ избави ны от сребролюбия и
стяжательства суетнаго,/ нищетою же духовною
обогати ны,// Лукиане досточудне.

Утушил еси страстей море пламенное/ хладом
страха Божия/ и уныние пагубное упованием на

Бога победил еси/ Емуже вопия присно:// не моя воля, но Твоя да будет, Господи.

Слава: На камени Божиих заповедей/ дом души твоея устроив/ не убоился треволнений житейских и болезней телесных/ и отразил еси соблазны вражия, // имже надлежит приити, по слову Христову.

И ныне: Из рода небеснаго произшедшаго/ разсмотрим, вернии/ Лукиана преподобнаго, молитвы делателя изряднаго/ Богородицы избранника// двема обителема Владычицу прославльшаго.

Песнь 8

В печи отроцы Израилевы/ якоже в горниле/ добротою благочестия чистее злата блещахуся, глаголюще:/ благословите вся дела Господня, Господа// пойте и превозносите во вся веки.

Благодать, в тебе живущая/ влече совета ищущих,/ слово твое, седмицею скорбей очищенное, печали утоляше многия/ и странных хлебом неоскудно питал еси, // всем вся на пользу подавая.

Обитель в честь Успения Пречистыя/ устроил еси, отче/ да приведутся Царю девы в след

Царицы Матере/ сосуды избранныя и чистыя себе соделати// милости и истины Христовы.

Слава: Грядущее яко настоящее/ зрел еси, святче Божий,/ слово рекл еси пророческое о судьбах храмов и обителей твоих/ еже и до дне сего сбывается// не остави нас молитвами твоими, отче.

И ныне: Игумение Всечестная,/ Покрове обителем,/ управи житие монашеское в месте сем безпечально и свято,/ Помощница явися пасомым и начальником// да едиными усты Тя величаем.

Песнь 9

Образ чистаго Рождества Твоего/ огнепалимая купина показа неопальная:/ и ныне на нас напастей угасити свирепеющую молимся пещь/ да Тя, Богородице// непрестанно величаем.

Образ чудный Рождества Богородицы/ в благословение обители строителю ея даровася/ сей бысть чадо обетное, от неплодове родившееся/ от корене свята// отрасль святая и светлая.

Успение твое удиви вся люди/ яко знамение неложное твоея святости:/ последнее воздав храму поклонение, на траву возлеци восхотел

еси,/ камень в возглавие полагая,/ / яко образ веры твоея и подвига жестокаго.

Слава: Приидите, братие, во храм Богоявления/ и видите раку отца преподобнаго/ яко кивот святыни присножизненные, чудесы сияющий/ и цельбы точащий/ / молитвами Лукиана игумена святаго.

И ныне: В день честнаго Рождества Твоего/ сподобила еси кончины угодника Твоего, Владычице,/ и ныне молимся память смертную имети присно и на Суде оправдаться/ да Тя, Богородице,/ / непрестанно величаем.

Светилен, гл.1

Сияние святых Твоих, Господи,/ освещает пути живота нашего,/ отгоняет мглу грехов и неведения,/ и образ показывает славы Твоея неизреченныя,/ еяже причастники да будем// ходатайствы Богоматере и Лукиана преподобнаго.

Слава и ныне: Праздника

Стихиры на Хвалитех, гл.6. Подобен:

Тридневен:

Благо ти есть, отче святой/ яко был еси игумен терпелив и милостив/ духоносен и добродетелен,/ не наемник, но пастырь

истинен,/ благо же и пастве твоей/ такового
отца дивнаго имети/ и пред Господем ходатая//
за грехи наша Судию умолити могущаго.

От Господа дар пастырства приемый,/ и овцы
погибшия от муки вечныя восхищающий,/
благодать же сию великую/ завещал еси
преемником твоим/ от нихже Корнилий
сильный, тобою предреченный/ иже
благонадежно и праведно продолжи дело твое/
заповедь Христову сотвори и многих научи//
тем восхваляем вы, святии Лукиане и Корнилие.

Сеявый слезами, радостию пожал еси
небесною/ поты и бдении ветхаго человека
победил еси/ терние страстей увядил еси/
житейских попечений и соблазнов бегая/
искушений тяготы не убоялся еси/ Христа
Подвигоположника на помощь призывая// от
Негоже венец спасения получил еси.

Слава, глас тойже:

По блаженнем успении твоём, Лукиане святе/ не
забыл еси чад твоих/ утешением велиим люди
утешил еси/ предстательствовати пред Господем
и Богоматерию я уверяя/ назидание
спасительное, любовь твою растворенное/
яко препитание духовное нам оставил еси/ и
мощи твоя чудесне сохранишася от руки
безбожныя// во спасение наше и укрепление.

И ныне: Праздника.